

## Ul püssee bell dì del mûnd

Te seret là tì, o mam,  
sott a la crûs del tò Gesü  
a beef ul cales amâr  
valzaa sù, sù chell altâr.

Spitt, sânc e sūdûr  
ghe rigaven la facia  
scavada in del dulûr...

I toeu eucc dîlz e lacrimûs  
deent in di soeu, lüminûs  
ma pièn d'un turmeent profûnd  
che interugava l'interu mûnd...

In di toeu brâsc avêrt, o mam,  
la sua misericordia amureul  
la m'ha per semper cunsegnaa  
e adess che 'l nost viacc  
l'è diventaa püssee fadigûs e tribülaa,  
tì, tenerameent, ciapum in brasc.

E in d'un'agunia de quej  
che te sturciâ i büdej,  
sott a 'n ceel de piûmb  
Luu, crucifiss, l'ha vusaa  
al ceel e al mûnd:  
*"L'è in di toeu mann, o Pà,  
che l'anima mia voeuri consegnà"...*

Sculti ul tò lameent de süplica  
e urazzion, denânz de la tumba  
de fregia e düra prea  
che la invultia la môrt  
in de la nocc püssee negra.

Ul fosch e la nocc resten amò  
i padron de la tera  
e semper püssee ingûrd  
la môrt e la guera

triumfen sù 'l mûnd.

Ma tì, o Maria, mam de tütt i credeent  
te speravet amò püssee 'fôrt  
in d'una matina che ribaltass la sôrt.

*"Risûrc, o tì che te dormet, Signûr uniputeent,  
perchè 'l sogn de la môrt el sia minga vinceent  
e riduna luus e speranza a tütt i viveent.  
Risûrc, o Fioeu, per dessedà un'aürora nuéla  
e fà cantà la vita e rinuà la tera".*

E dopu un tremendu teremòtt  
ch'ha daa l'avîs e tremila stralüsc  
ch'han faa stremì i nemîs,  
tì, o Maria, t'hee guduul la luus  
de la Resürezzion per prima,  
s'ciupada amò prim  
del prim ciâr de la matina.

Cunt ul coeur in gula  
che te bateva a mila a l'ura,  
t'è cumparuu, gluriûs e splendeent,  
ul tò Fioeu risurgeent.

E tì te stavet pü in de la pell  
e alura t'hee esültaa, t'hee cantaa  
e peu t'hee anca balaa, là in facia al sù  
ch'el spuntava a l'urizzûnt, prûnt  
a inciarì ul püssee bell dì del mûnd.

Cunteent cumè scèpp de primul nuvèj  
spuntaa in d'un bòtt süi rivèj  
a beef ul calûr del sù e la luus di stell,  
se sentum lingeer cumè rundin del ceel  
che impiendissen de vita tütt i primaveer  
perchè ormai l'è 'na certezza infinita:  
morta la môrt, triumfa la vita!

Angelo Galbusera - Pasqua 2021

*Nota bene – Ricordiamo che la proprietà letteraria di questa composizione appartiene interamente ed esclusivamente all'autore, ed all'Associazione Sentieri e Cascine, che la pubblica sul suo sito. E' assolutamente vietato qualsiasi uso commerciale, mentre è consentito, citandone correttamente e interamente la fonte, utilizzarla per finalità culturali, educative, aggregative.*

